

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(VII)8

**SOALAN BERTULIS OLEH AHLI KAWASAN PANTAI JEREJAK
YB. DATO SAIFUDDIN NASUTION BIN ISMAIL**

8. Huraikan perancangan strategik dan pelan tindakan di peringkat Kerajaan Negeri untuk pembangunan dan kesedaran wanita dari sudut kesihatan, keluarga, kerjaya dan hak wanita dalam undang-undang.

**YB. CHONG ENG
MENJAWAB BAGI PIHAK Y.A.B. KETUA MENTERI**

8. Perancangan strategik dan pelan tindakan Kerajaan Negeri untuk pembangunan dan kesedaran wanita dari sudut kesihatan, keluarga, kerjaya dan hak wanita dalam undang-undang adalah seperti berikut:
 - (i) Kesihatan

Kerajaan Negeri melalui Jawatankuasa Majlis Mesyuarat Kerajaan (MMK) Kesihatan telah menganjurkan Program Mammo Penang sejak tahun 2015 yang memberi kemudahan pemeriksaan mammogram secara percuma. Kerajaan Negeri juga menganjurkan *Pink Oktober* pada bulan Oktober setiap tahun untuk memberikan kesedaran terhadap kanser payu dara.
 - (ii) Keluarga

Kerajaan Negeri menawarkan bantuan kebajikan seperti Bantuan Ibu Emas, Bantuan Ibu Tunggal dan Bantuan Anak Emas kepada wanita-wanita yang layak berdasarkan kriteria yang ditetapkan. Beberapa program juga dilaksanakan untuk wanita seperti berikut:

- (a) Klinik De'Stress - Memberi pendedahan personaliti diri, kemahiran asas kaunseling, kemahiran komunikasi dan teknik pengurusan emosi seperti stres, dan marah.
- (b) Program WAJA - Memberi pengetahuan dan kesedaran kepada masyarakat khususnya mengenai jenayah.

(iii) Kerjaya

Kerajaan Negeri melalui Perbadanan Pembangunan Pulau Pinang (PDC) telah menyediakan kemudahan pinjaman mikro kredit melalui Projek Titian Saksama Rakyat (PTSR) Negeri Pulau Pinang bagi membantu mewujudkan satu sistem penyaluran modal tambahan yang mudah dan tidak membebankan peniaga kecil. Pemberian kemudahan pinjaman mikrokredit ini meliputi semua golongan peniaga termasuklah wanita dan ibu-ibu tunggal berdasarkan perniagaan masing-masing. Pinjaman PTSR ini disalurkan tanpa sebarang cagaran dan penjamin dengan jumlah pinjaman antara RM1,000.00 hingga maksima RM20,000.00. Tempoh bayaran balik antara 1 hingga 2 tahun.

Kerajaan Negeri melalui PDC juga telah melaksanakan program-program keusahawanan kepada semua golongan usahawan termasuk usahawan di kalangan ibu tunggal seperti bengkel, seminar dan kursus pembudayaan dan motivasi bagi memperkasakan ilmu pengetahuan, kemahiran dan kefahaman usahawan dalam bidang pengurusan perniagaan supaya menjadi usahawan yang berdaya maju, berdaya saing dan berdaya tahan.

Kerajaan Negeri melalui *Penang Women's Development Corporation* (PWDC) telah memperkenalkan Projek Transformasi Ekonomi Komuniti (CET) di bawah Program Pemerkasaan Ekonomi Wanita (WEE). Ia merupakan sebuah projek yang direka khusus untuk membantu menjana pendapatan bagi penduduk, termasuk ibu tunggal. Sebagai projek perintis, PWDC telah mengadakan dialog untuk memperkenalkan program ini kepada penduduk Program Perumahan Rakyat (PPR) Desa Wawasan pada bulan

Februari 2018 dan seterusnya mengedarkan soal selidik untuk mendapat maklumat terperinci yang mana akan membantu PWDC membuat analisis keperluan penduduk PPR Desa Wawasan. Hasil analisis soal selidik menunjukkan 37.4% responden memilih kraftangan sebagai aktiviti CET. Satu siri bengkel membuat kraf kertas dan kraf plastik telah dikendalikan untuk penduduk yang berminat. Kini, hasil kraftangan telah mula mendapat tempahan dan ada penduduk yang sudah mula menjana pendapatan.

(iv) Hak wanita dalam undang-undang

Jawatankuasa MMK Agama dengan kerjasama PWDC telah mengadakan dua konvensyen mengenai hak wanita dari segi Hukum Syariah supaya kaum wanita lebih memahami hak mereka dalam hal perkahwinan dan penceraian. Program yang dilaksanakan berkaitan hak wanita dalam undang-undang adalah Klinik Guaman yang membincangkan tindakan yang boleh diambil oleh wanita yang mengalami keganasan rumah tangga. Kerajaan Negeri juga melalui Jabatan Agama Islam Pulau Pinang (JAIPP) telah mengadakan program Klinik Celik Undang-Undang Keluarga di seluruh daerah dengan memberikan penerangan berkaitan hak-hak wanita dalam Enakmen Undang-undang Keluarga Islam dan membuka meja/kaunter bagi menjawab pertanyaan dan memberikan perkhidmatan khidmat nasihat guaman.